



---

## Da la suprastanza cumünala

---

### Containers pel center da passlung Manaröl, Scuol

La situaziun actuala dal center da passlung in Manaröl fa pac üna buna impreschiun. Ils containers sun vegls ed in ün stadi desolat. Ün votant ha fat la proposta da plazzar 8 containers sülla piazza existenta. 4 containers servissan sco local da butia, ün per tschairar, ün per duschas e tualettas, ün pel material da la loipa ed ün sco gardaroba.

Ils cuosts per cumprar tuot ils 8 containers e per metter ad ir il plazzal sun calculats cun CHF 214'700.00 incl. IPV. In quist import es integrà eir il s-chodamaint cun üna pompa da chalur sco cha la ledscha d'energia pretenda (CHF 20'000).

Eir schi vain plü o main be megliorà l'aspet da l'areal schi es quist ün'investiziun chi fa dabsögn. Uschè as vessa üna soluziun satisfacenta pels prossems 10 fin 15 ons. La suprastanza decida perquai da preverer l'investiziun cumpletta aint il preventiv da l'on chi vain.

### Fermativa da bus Sachs, Scuol, suost da la vart vers süd

Pel mumaint nun han ils passagers chi spettan il bus per ir in direcziun vers ost ingüna pussibilità da star suot tet. Ün suost in quel lö fa nair dabsögn. Perquai decida la suprastanza da far l'investiziun e surdà la lavur da serrurier a la firma Bischoff Metall AG, Scuol.

### «Mountainbike Trailcenter», Ftan

Culla revisiun parziala da la planisaziun da Ftan dessan gnir s-chaffidas las premissas per la realisaziun d'ün «Mountainbike Trailcenter Ftan». L'elemaint essenzial da quel es ün «Skill-park» chi s'extenda sün s-chars 10 hectaras ed ha üna lunghezza totala da var 3 km. Il lö as rechatta al nord vest da l'Institut Otalpin in üna costa cun pendenza mezdana e paca bos-cha. Ils trails dessan gnir adattats plü bain pussibel a la cuntrada.

Üna cumponenta dal «Trailcenter Ftan» es ün ingrandimaint da la rait da turas da bike sül territori da Ftan, e quai sco cumplettaziun da las rutas nr. 442 (Engiadina Bassa) e nr. 444 (Nationalpark Bike-Marathon) chi passan tras Ftan. Las novas rutas chi sun da signalisar e chi fuorman üna part dal concept da bike Engiadina Bassa sun las seguaintas:

- Prui – Nischöl – Prasüras – Ftan
- Motta Naluns – Salez – Pravdlèr – Ftan

La suprastanza sustegna il «Mountainbike Trailcenter Ftan» ed es perincretta d'inoltrar la proposta correspondent a l'uffizi pel svilup dal territori (ARE) per ün'examinaziun preliminar. Per quist intent es d'adattar la ledscha da fabrica, il plan da zonas ed il plan general d'avertüra. Quists adattamaints han da gnir suottamiss al suveran a temp ütil.

### Surdattas da lavur e d'incumbenzas

Sauaziun Sent, adattamaint e cumplettaziun dal proget

- Installaziuns electricas: Electra Buin SA, Scuol